

校  
禮  
堂  
詩  
集

校禮堂詩集卷九

欽淩廷堪次仲撰

申寅

寄祝座主韓城公七十壽詩四首

灝瀚河渭流截薛華嶽峙扶輿氣磅礴往往眞儒起我  
師西北秀當代大君子發揮周孔蘊敷佐堯舜理都俞  
契

帝心謨猷載國史崧生雅所歌田間敢妄擬獨愧樗櫟  
材忝列門下士願如山之高朝野共仰止願如川之巨  
民物永依被頌禱實至公匪特感知已

儒者生世間所貴在立身立身偶不慎萬事俱灰塵懿  
訓垂簡策此意時相親復疑今昔殊後賢難比倫何期  
接提命儼對古大臣和以接羣物嚴以待小人立言平  
且易隨地皆可循讀書求實際不在高崖垠顏子樂其  
樂孟氏醇乎醇始知往哲論片語非無因不敏請從事  
再拜書諸紳

易自漢以來說者何紛然公獨玩其辭靜對十翼篇但  
以象象意遙闡苞符傳憶當受業初執經函丈前公爲  
辨疑似去取無拘牽王弼理旣鑿費直數亦偏必兼理  
與數大義始得全妖妄斥絳緯詭異羞攤元正論發秘

與諸儒莫之先他時著述成公壽垂千年

在昔策大廷名冠多士首於今弼

聖時位居百僚右華國復匡世科名始不負餘事爲文章氣象涵萬有原道韓退之正蒙張子厚古人託空言公展經濟手昨歲侍公側薰陶惜未久旋發春明門青毡歸養母今公登七旬弟子羣進酒擬附鳳皇飛躋堂介糜膏

題程尹谿觀日圖

頽虬蹙浪湧金輪俯瞰羲和面目眞回首蒼蒼煙霧裏幾多捫籥扣槃人

題載空上人補衲圖

集得芙蓉欲禦寒  
秋來方覺水田單  
不如且向蒲團坐  
檢點雲山舊衲看

答孫熙堂

吟情大似吳刀澀  
詩思渾疑蜀道難  
多謝子荆零兩句  
報書聊當和章看

泊橫林

晉陵山色爭無塵  
小泊橫林景倍新  
白袷風前沾酒客  
青裊水際浣衣人  
蘋花挹露都如雨  
楊葉當秋只似春  
他日扁舟重過此  
漁郎莫誤舊時津

重陽日過嘉興作

疎柳傲傲蔽酒樓滿湖煙雨澹生秋鴨餛飩好微鹽漉  
不負重陽過秀州

雨中過石門縣

儘日西風急扁舟冒雨行迴溪蘆作岸古縣石爲城隱  
隱吳山遠茫茫越水平蘇堤秋色好須放詰朝晴

塘棲道中

長空幾縷斷霞明帆挂秋風分外輕但覺人如天上坐  
不知船在鏡中行林端遠岫穿雲出草際疎花夾岸生  
底事傳經堂畔路晚來唯聽棹歌聲

靈隱

入門秋色點衣濃遮道清泉夾道松山石鑿成千萬佛  
溪雲幻作兩三峰招邀廉訪舟車力消受瞿曇筍蕨供  
他日好攜香一瓣旃檀座下禮金容

龍井

試酌龍井水來烹龍井茶湖光留粉黛石色老烟霞碑  
紀前朝蹟仙宜此地家何須乞勾漏萬里問丹砂

自靈隱至龍井放舟循白沙堤而歸

歷遍招提領妙香平湖歸路晚風涼剡藤乍展圖千尺  
塵匣新開鏡一方雙闕疑瞻天尺五十洲遙指水中央

買田陽羨非吾志便合移家住此鄉

次廉使謝蘊山先生九月晦日行香天竺遂至龍井由瑤璫寺放舟而回四首元韻

乘曉經初地留連未忍回此中諸佛現何處一峰來玉版有真味蒼官無點埃使君騁從簡曾不損莓苔

古井近丹竈一泓香不腥靜涵詩客瘦寒沁酒人醒龍去水猶碧鶴歸天更青虛廊尋往蹟碑字久沉冥

半壁疑圖畫丹青倚右丞遠山紅樹杪飛閣白雲層細草封仙宅微風颭佛燈試參齊物論成毀總難憑

廉使今蘇白湖山得主人柏臺朝執法芸館夜留賓已



蠟花時屐還投水際綸懸知佳句好傳徧浙江濱

題胡雒君環山舊隱圖

數椽小構亂雲間竹木蕭疎水石環留得百年先業在  
便歸不用買青山

次韻答謝公子崇之

時年十二

十年慚愧祖生鞭長笑醺雞甕裏天羣紀交情今日訂  
齊梁結習幾人捐三霄好挹金莖露五夜須勤雪案氈  
記取鳳毛家學在桐花重和玉溪篇

次謝蘊山先生湖上看紅葉二首

權轉南屏景倍奇丹黃新染寺前枝入門冠蓋僧趨疾

覓路松杉客到遲幾樹澹橫秋水外半林濃到夕陽時  
諸天盡作珊瑚相色界從來未有涯

一夜清霜秋滿湖楓林高下望模糊襯來淺碧溪光靜  
界破微紅塔影孤落葉寒雲翁卷句晴巒蕭寺李成圖  
春回好証重游約坐待東風草木甦

題簷笠東明經小照二首

溪聲瀾瀾雨疎疎戴笠春疇日荷耒自古農家歸七略  
茅檐閒緝勝之書

二頃甘爲附郭農買將黃犢擬相從何時細講區田法  
上地能收畝十鍾

乙卯

喜海寧陳仲魚雪中過訪并題其說文解字正義  
打窗密雪晝紛紛有客攜書過訪殷十載京華久傾倒  
衝寒今日始逢君

二徐去後久塵埃許氏榛蕪此再開體例不嫌同孔賈  
通經原自六書來

同胡稚君游天竺

步出錢塘門湖光碧於染百錢買小舟輕比鷗一點數  
里乃登岸佳境入以漸寺遠丹嶂圍峰高白雲掩山泉  
靜有聲石路平不險里媪合掌進厥狀佞且諂金帛競

布施詎問歲豐歉羣髡坐收利不用事箕斂信鬼越俗  
然誰爲立防檢妄想固可嗤虛擲更宜貶倘司牧民責  
願言示之儉太息循歸途旃檀香冉冉

韜光

虛廊一徑入深翠彈指忽現空中觀底須七寶裝世界  
自有萬箇青琅玕天風扶人登極頂不信塵寰有此境  
悠然微會心自知隔江飛過芙蓉影

過嚴子陵釣臺

百丈遙牽上瀨船抽帆小泊釣臺邊故人仗劍方爭地  
野客持竿亦應天不解鼉聲黃室主可憐龍鬬赤符篇

登臨猶記經過處屈指春風十四年

白沙埠

曉發白沙埠水色疑琉璃蒼蒼兩岸山分照雙蛾眉嵐  
光潑眼淨無滓俯首看山山在水舟行一步一改觀縱  
有丹青難落紙我昨自西湖來兩堤花柳心顏開如  
讀沈宋應詔作雖極典麗無驚才睦州好山忽相見耳  
目欣然都一變涪翁奇峭放翁新不數岑參與常建又  
如飽食官家厨大嚼已飫牛羊豬偶逢羸蛤頓爽口臙  
臙堆案翻嫌腴吁嗟乎人情矯僻靡不有厭常喜異由  
來久不如彼此兩忘言篷窗靜酌姚州酒

港口道中

齒齒春流走急湍，碧磯噴雪浪花寬。  
都緣帆得長風助，忘却舟行上水難。  
浮蟻試尋晡後醉，買魚聊佐晚來餐。  
計程此去鄉關近，指點雲山細細看。

街口舟中卽事

游魚真可數，澄澈水疑空。  
山在微雲外，舟行亂石中。  
推篷遙待月，挂席飽乘風。  
莫道遲春信，疎梅已露紅。

金灘

高瀨建瓴下，輕舟與水爭。  
飢蛟騰浪影，怒馬蹴江聲。  
漁父閒相向，篙師慣不驚。  
須臾看出險，依舊綠波平。

題程易田先生讓堂話別圖

國朝多通儒吾郡尤粹深江戴旣云逝存者程與金修  
撰究鄭賈他學旁不侵廣文證名物制度勤披尋著書  
號通藝識到緣思沉考工諸器數洵足掩古今九穀辨  
其類七泝求其音釋間上下篇字字皆璆琳時或匡舊  
義廢起膏肓鍼鯀生幼失學辭賦虛光陰稍壯研士禮  
若水無涖薄亦思少撰述弇陋終難任先生我舊識講  
論夙所欽京華屢請質獎借兼規箴片語啟扃鑰恍聽  
成連琴一別將十年歲月何駸駸喜君健猶昔杖履時  
相臨呼酒命我飲出卷索我吟昨登修撰堂方慰仰止

恍今與廣文別又增離索心聚難散頗易愁對春情惜  
詩成不暇點聊用記分襟愧爲鄉後進詎敢攀苔岑願  
言附驥尾姓字書儒林

休寧道中

淺淺溪流細細風烟拖楊柳綠迷濛中間柳斷烟疎處  
露出桃花幾尺紅

望齊雲巖眞武殿作歌

歛山萬壘青氤氲一峰南出名齊雲遙觀臺殿接雲表  
雲氣下護旃檀薰紅塵十丈飛莫到森嚴幽閼神所欣  
沿途男婦雜童叟亦有少女褰青裙長橋跨澗石齒齒



飛瀑赴壑波沄沄盤空高磴厖匪易偃僂拾級何殷勤  
市香奉幣口默禱願降福祉除舊氛茲神赫濯數百載  
前明肇祀古未聞或疑須女之七宿厥象上應元枵分  
禮稱天神壇不屋豈與人鬼爭苾芬不然恐是汁光紀  
流俗附會識所云緇黃依托攀二氏闢言鄙誕嗤紛紛  
能捍大災禦大患祀典詎曰非功勲我聞民在卽神在  
從古立社緣成羣前者爲柱後者稷遞相配位祈耕耘  
周語但紀內史過楚辭亦載雲中君乃知神亦有顯晦  
寧獨城陽蔣子文陋儒攘袂詆淫祀不知通變空斤斤  
從宜因俗貴精義底用援引談皇墳不見衛民兼衛國

徧祀後漢前將軍

雨中過楓嶺

春泥擁路費躋攀嶺上行人自不閒  
旅思重重無著處  
籃輿聊看雨中山

大洪嶺

羊腸一線路盤空疊嶂層層望不窮  
行過白雲渾未覺  
回看人在白雲中

油柞嶺道中

竹樹蕭疎水一涯雨餘景物望中賒  
老紅遮路知三月  
深碧浮空認九華  
莫羨壽陵餘子步且乘下澤少游車

松蘿先生集 卷之六  
僕夫旣倦何妨住小憩前村問酒家

柏山渡雨發

一夜檐聲攬客眠曉看雲氣四山連危磯水際似人立  
飛瀑雨中如布懸草色侵衣寒漠漠溪流赴壑響涓涓  
信知行路難如此輸與村翁坐釣船

發雞兒灘雨中卽事

登程已十日無日不逢霖昨夜雨尤大今朝泥更深畏  
看雲出岫靜羨鳥投林寂寞春山裏聊爲擁鼻吟

黃湓

濃雲壓嶺密還疎波滿平疇水滿渠自笑廣文官獨冷

春來何事雨隨車

渡江喜晴

皖公山色翠相迎  
沙岸遙看馬足輕  
隨路莫辭連日雨  
渡江眞喜一朝晴  
挂帆安穩風徐送  
打槳潏洄浪不驚  
聞道宣州魚米賤  
未妨奉檄慰毛生

題桐陰讀易圖

桐陰匝地雨初收  
逸象何人解細求  
我欲與君論互體  
一編重校李資州

采石望虞雍公戰處有感

海陵南征強且悍  
杭宋當之石壓卵  
先聲遠播小朝廷

校禮堂詩集

卷九

已令臨安百官散劉錡衰年怖成病采石江邊鐵騎亘  
敵人偶爾未濟師遽說書生能制勝由來宋史辭多誣  
炎興十事九事虛興尸蹙地望風潰事後皆以大捷書  
東京擁立小堯舜再欲渡江人不順戕君整眾徐徐還  
在道曾無一騎遁元宜設不夜爲變鴉鵲重來敢迎戰  
鶴林老子有公評耳食紛紛誰與辨童頭豎儒倦於學  
金源之書束高閣可憐涑水續方山遂使雍公媿康樂

金陵懷古用王荊公韻四首

沿河四戍恥憑江廣固長安敵盡降天外休徵丹鳳隻  
夢中嘉瑞白龍雙赫連度塞宵飛檄柘跋窺船晝啟牕

惟有尋陽陶靖節東籬笑指菊花缸

咀須老將控荆江秉桀懷中未肯降龍顏風雲方應六  
鸞肩日月已成雙釧名琥珀金爲飾樓號瑤璃錦作牕  
從此屠酤皆樂事豕羊懸肆蟻浮缸

青絲白馬下橫江大帥連營解甲降草長廢宮鶯囀百  
柳遮遺壘燕飛雙疎鐘已咽銅仙闕明鏡徒懸玉女牕  
讀罷蘭成蕭瑟賦向風那惜酒盈缸

歌罷黃鸝月滿江蠻奴精騎望旗降分疆僅得殘糒半  
入井真成大體雙乍見金戈來曉苑可憐瓊樹映晴牕  
臨春故址今何在賸有飛花點翠缸

校禮堂詩集卷九

校禮堂詩集卷十

欽浚廷堪次仲撰

丙辰

題王栢庭壯士十年歸圖

北風滿天塞草折壓手貂裘冷於鐵壯士從軍十載歸  
馬蹄帶得祁連雪歸來迫想聊作圖貌此七尺昂藏軀  
會須共君話游歷酒邊細證蘭臺書

周最峰邀游敬亭山翠雲菴歸以詩見示奉和二

首

攬勝人初到峰迴覓路難蹬穿紅樹杪菴在翠雲端破



屋炊烟寂虛堂佛火寒劇游多古意乘興更憑闌  
鐘磬聲俱歇空山靜不譁庭砌堆冷葉石罅露寒花孤  
雀遠投嶼病僧閒煮茶亮無車馬至誰與護烟霞

題朱琴川集陶詩後四首

集陶編入遺山集又向詩家闢一途誰信後來翻在上  
前賢應歎積薪無

元遺山雜著詩稟氣寡所諧衣食固無端五首皆集陶成句見集中

彭澤何心覓句工咏歌本與性情通秋來一樣東籬菊  
少爲移栽便不同

毅父詩傳集古勞家雞逐鳳未云高多君碎織光明錦  
盡是丹山五色毛

文章妙處本無奇，今古何妨共取之。  
底事南陽樊紹述，苦心絳守記園池。

次韻答朱立堂

東風門掩落花餘，一榻青山卧讀書。  
別後應添詩卷富，年來莫遣酒尊虛。  
遙憐華鬢絲相似，猶記清談玉不如。  
何日宛溪溪畔路，蕭齋重與慰離居。

寄視山西方伯謝蘊山先生六十壽二十四韻

盛代推良佐，唯公迥出羣。  
照人秋漢月，潤物泰山雲。  
早歲登仙掖，巍科契

聖君食邀

天府饌衣惹石渠芸鷺序聲名貴螭坳姓字芬金章三  
秉節玉尺再衡文桃浪平淮甸棠陰滿浙濱去思吳士  
戀來暮晉民欣近值菰生候遙知華祝殷寸心惟感激  
蕪語漫紛紜尙憶相逢際都忘貴賤分解推情已摯獎  
勵意尤勤侍坐箋同擘論文酒共醺愧非和氏璧虛費  
郢人斤竊念依曾久聊爲述所云說經尊往訓著史邁  
前聞賦壓紅綾宴書傳白練褰鴻篇騰萬口健筆掃千  
軍宛水循聲在黔黎舊德薰當年沾化雨遺愛婉高雯  
賤子持毛檄卑官典泮芹側聞田畔叟猶道昔時勲井  
里安耕鑿膠庠樂夕昕願書清德頌輦石勒河汾

丁巳

寧國學署梅花盛開偶作

寂莫東風晝掩關  
梅花開後識春還  
空庭忽作眾香國  
片石真成羣玉山  
客子拋書閒縱目  
老親扶杖靜開顏  
何時更買雙溪宅  
手種寒香十畝間

聞抱經先生卒於常州之信

髫年猶記讀公書  
宇內靈光信不誣  
其許康成談六藝  
獨邀皇甫序三都  
曾爲拙稿作序  
素車東望雲連野  
丹旆南歸雪載塗  
身後漫愁遺稿佚  
晉陵編校有生徒

皖城喜晤朱少河同年卽次石君師寄少河詩元

韻

握手皖江路好風清且和一羶生計苦五載別懷多薄  
醉聞中聖微吟靜卻魔天衢知不遠期子上鑾坡

座主石君先生內遷兵部尙書恭送四律

再持龍節撫江東旋被

新恩晉爵崇周室夏官專九伐漢家司馬本三公從知  
盛世賢斯舉始信真儒位必隆遙想朝端佳氣滿百僚  
爭覩大臣風

童叟扶攜擁路看潁川入相欲留難文章一代唐燕許  
勲業千秋宋富韓華國屢登青瑣闥壽民仍望紫金丹

自茲寰宇添膏澤不獨東南八郡安

道該本末士咸稱惠政嘉謨悉準繩薄海久經同仰望  
此身原不解驕矜維摩老去花如雪嶺嶠歸來橐似冰  
試問洛閩談學者古今若是幾人能

尙憶橫經侍講帷梗楠櫟總含滋少陵廣廈孤寒庇  
君實高名走卒知拜手賡歌虞陛日濟川霖雨傅巖時  
他年竹帛存公論詎爲私恩有濫辭

泊大通

孤舟當晚泊盡日少行人苦竹啼山鬼叢祠賽水神半  
輪江上月一葉客中身颯颯閒蘆荻猶聞嘯碧津

偶成

高樹影遮屋好花香滿庭  
藜羹朝視膳竹几晝研經  
對酒易浮白著書難殺青  
所思勞北望何處寄芳馨

題表忠錄爲桐城孫節愍公作

節愍名臨唐王時以職方主事監揚

文驄軍順治三年被獲死於浦城乾隆四十一年賜今謚

空拳冒刃壯心摧日薄虞淵挽不回  
甘飲素虯歸北闕怕歌朱鳥向西臺  
義人齊下王琳泣烈士誰興蹇鑒哀  
詎意百年公論定易名

恩自九天來

晉甄歌

浙江布政使謝蘇潭先生葺衙齋得古甌八枚甌側  
有永平字者七永興字者一胡維君徵君定爲晉惠  
帝時物丁巳七月拓以見寄爲賦此詩

蘇潭先生貽我書遠示晉甌之拓本上有永平永興字  
波磔稜稜猶未損桐城徵君雅好事著手親撫土花翠

考之當屬晉惠年識學應增古甌記

維君著書  
名識學錄

永平改

年楊駿誅永興元海稱單于中間元康僅十載張裴當  
國民無虞爾時三吳誇富庶營造家家競馳騫可憐誰  
與督揚州忠壯淮南馬欽度近來金石負重名其推吾  
師翁北平竹汀少詹竝時起能使洪趙歐陽驚矻矻窮



年事攜載搜羅遠及宜禾塞此輒咫尺竟未知萬物從來有顯晦吉金附印石附輒北平體例超前賢他時會見留新詠好入蘇齋學古編

昔在南昌嘗與蘇潭先生擬仿山谷精華錄之例取

覃溪師集中考辨金石及疏證經史之詩爲一集曰學古編爲詩家另闢途徑尙未遑從事也

### 題胡本亭小照二首

割鮮飲到半酣時恰好鱸魚觸釣絲我愛鐵溝喬太博不從侯喜辨鱗鬚

輕舠一葉駐烟波笠澤松陵興若何底事浣花貪大嚼東津兩賦打魚歌

### 題吳楚帆同年洗硯圖二首

墨譜茶經結靜緣一池春水碧於烟臨流重啟玻璃匣  
細與疏寮校硯箋

長松高映石嶙峋小坐間吟見性真洗淨端州鸛鵒眼  
新詩何處著纖塵

題孫雨窗公子竹窗聽雨圖二首

廿載江湖客夢驚雨中猶記箏龍鳴何時廣構千間厦  
我亦生平愛此聲

不須翦燭唱瀟瀟一卷長吟破寂寥聽到隔窗無驟響  
始知脩竹勝甘焦

伯元閣學以秋桑詩四首見寄時別逾四載離緒

方深謹次元韻聊志搔首踟躕之感

野田零雨澹生寒  
宛宛濃陰望欲殘  
酒到蒲城應號落  
水過瓜臯合名乾  
纏綿遠道思千里  
信宿枯禪指一彈  
江國更誰衣被廣  
摺風休作井梧看

城南倭墮晚徘徊  
懶傍丹楓競綺才  
香萼昔經鳩共醉  
寒林今賸雁頻來  
關心碧色筐中減  
瞥眼青陽宅畔迴  
便擬結鄰苕雪上  
稻花深處對門栽

柔柯霜後染新黃  
寂寞何因見貴郎  
伐向西風剛八月  
采歸南陌已三商  
樓頭影惜垂垂老  
屋角聲驚策策涼  
想見秋闈萑葦具  
織縑都比故人長

無多蠹葉抱疎枝岐路蕭條夕照遲樂府素琴齊變節  
羅敷綠鬢半成絲最憐冷蠋初緣日猶記春蠶正食時  
珍重女紅生計本使車好備採風詩

元作

儀徵阮元伯元

扁舟衣袖乍驚寒下若桑林綠意殘初響天風知半  
落未逢夜雪已先乾樓前有日蒼涼出陌上無箏錯  
落彈若使秋胡歸獨晚黃金原向絹機看

西河古社重徘徊木葉應知庾子才淇水秋期貧婦  
怨晉廷九月餓人來采菱纖手空成妬舞柘輕腰不  
共迴偏是吳儂易焦萃十年牆下記親栽

疎陰十畝間青黃誰向花前喚索郎釀秫時光宜薄  
醉調弭情緒動清商但教天下輕絛煖何惜林間墜  
葉涼試種東坡三百尺芟來終比暮雲長

漁陽八月已空枝還是吳興霜露遲黃鳥不來翻落  
葉青蟲相對挂寒絲綢繆陰雨經年後收拾斜陽欲  
暮時料有茗溪老桑苧洞庭秋色滿新詩

題張季虎天女散花圖

畫作頭  
陀像

曼陀無數法雲開笑卻熊羆本辨才摩詰已非居士像  
尙煩天女散花來

王子卿取易觀卦六三爻辭作觀齋圖因以自號

石君師闡風地之義題之蓋勉以觀國尚賓云  
爾丁巳十月子卿來宜州出以見示爰用鄭學  
發明師說

鄭氏釋盥薦特引鄉飲酒利用賓於王觀生乃無咎是  
謂禮注易匪獨論奇耦自從漢學微此說廢已久苟虞  
尚紛岐何況輔嗣後披圖發疑義待向經神叩獻爵酬  
以觶興賢意良厚君子志未平象在觀上九

吳春麓同年客宜州每過學齋輒論文不倦昨以  
二詩見柬意甚謙下余愧其言久而未答時春  
麓家貧將以縣令就吏部選而會試之志不堅

酒後偶有所觸率成二截和之興來意各不相  
蒙也

鏡裏粧成絕世姿雙眉自信總相宜繁絃急管當筵舞  
不似寒閨刺繡時

青樓別有四時春咫尺爭妍各笑顰隨分蓬門壓金線  
綺羅香重更愁人

附來詩

桐城 吳麇枚 春麓

結習當年劇未除鴉黃間貼曉粧餘畫眉深淺何須  
問門外初停大婦車

西樓高唱接陽春一曲風香調入神會得繁絃須秘

響真成善本度崑崙

校禮堂詩集卷十

校禮堂詩集

卷十



校禮堂詩集卷十一

欽淩廷堪次仲撰

戊午

題楊克堂醉漁圖

漆園漁父傲宣聖楚辭漁父譏靈均賢愚千古兩不問  
但知痛飲玻璃春虹霓百尺珊瑚色懶作滄洲釣鼈客  
使令移家住醉鄉終朝拍浮酒池側酒池雖淺無風湍  
麴塵深處客垂竿蝦蟆跳過雀兒浴一寸聊復供晨餐  
上蔡公子牽黃狗韓盧宋鵲紛紛走不如水上放鷗鷺  
况有平生一杯酒有魚無魚何足嫌釣直釣曲徒詹詹

我願柳陰沉醉後更分餘酒餉陶潛

偶作

扣鐘作鐘響拊磬爲磬聲不聞扣鐘時以磬代鐘鳴妍  
鑒妍則見媼鑒媼乃呈不聞明鏡中妍媼乃異形外樸  
內藏姦妄使愚氓驚氓愚不可欺安容竊嘉名寄語詐  
諛子人世多公評

答孫雨窗公子見寄二首

如畫江城靜裏看閉門始信足音難多情賴有佳公子  
肯寄新詩到冷官

丹陽白下路迢迢百里相思托暮潮他日南窗修竹下

會偕張籍訪孫樵

謂張季和

題張季和黃山紀遊詩卷

一卷清詩妙入神  
摹山刻水倍鮮新  
豪端盡帶青霞氣  
松下應逢綠髓人  
吟詠每從登覽健  
文章時露性情真  
他年雲路舒鸞翮  
好賦蓬萊頂上春

石君師用昌黎薦士詩韻題校禮圖見贈五言古  
一章敬次元韻報謝兼答阮伯元閣學王儕嶠  
編脩

昌黎薦士詩詰屈法周誥千秋愛才念文與情竝到豈  
同浮薄流標榜立名號文章真卻竅一一爲批導寒齋

靜諷誦如見古人操吾師今韓公論材辨豐耗衣被滿  
天下幾人列安與鳴鳳翔丹穴迥異百鳥噪樹木必樹  
嘉飲泉不飲盜敦行龍頭選持躬虎尾蹈涯岸鮮矜張  
門戶禁侵暴明剔厯中外稱譽徧穹壤實大聲必宏如  
聞奏祓驚黃裳占自吉緇衣素所好匪獨守鄒魯兼可  
化昇鼻賤子抱禮經尺蠖困行潦匍匐光範門上書屢  
不報延堪三應京兆  
試始一登副榜公時持玉衡餘丹分鼎竈釋褐登  
公堂耳目發瞶眊學識方虞淺升進詎敢躁三復白華  
篇親年將耄耄懼乏百里才利祿忍輕冒投牒乞一壚  
循陔志母傲適公撫江左請惟喜重造學禮質疑義良

枯悉蒙燾貽詩極獎披感深反成悼同門荷兩賢酬和  
逾紵縞伯元我石交心曲奚待告弱冠聚邗上塵埃共  
席帽綢繆風雨夕切磋雨勿繆譬之羊在鉤唯苦始能  
芼儕嶠本霸才彈丸小箕郤流黃舊織綺結綠新琢瑁  
同歲舉南宮玉堂先拔蠶輕肥漫欣羨事功庶祈禱自  
憐飯不足殫卯寧望菹脩塗通都驛書倉大河漕但令  
吾道存莫作儂歌懊闌干苜蓿盤遠勝牛酒犒何當端  
章甫贈賄溯郊勞

元作

大典  
朱珪  
石君

儀禮十七篇姬孔所教誥聖人柔萬物節性義精到

損益兼夏殷名物辨詔號執肆非空文綿蕞在師導  
雜服體斯安相瞽縵可操蘭陵學久廢高密傳亦耗  
慶愆雖分門彥植誰窺奧昌黎掇奇辭鸞鍛欣鵠噪  
豆籩失司存珠玉毀儒盜渡君起江南便腹擇履蹈  
鈞元有湛深解紛無慢暴璇璣摘九重華離擘四壤  
自求照水犀不取籥雲驚勾股捷心能均律晤雅好  
鑒空恥說籌障瀾勇逾昇源流會朝宗疏濬先溝潦  
治禮著釋名尊解析酬報衍雅七又五益瓶逮鑄竈  
左圖而右書經緯了不恥窮年校毫芒內心平矜躁  
示我如望羊學落智已耄神往緇帷林服器誰敢冒

君才北海若大量抱不傲忝我一日知拔尤初進造  
遠利就冷官童冠資育燾自甘蘭華養肯發蘊鹽悼  
脩耕卽畱畚椎髻樂蒸縞君方束圭璋特達待上  
告鸛鰾翩來庭卮酒花映帽履泰際光輪敷薦敢  
恡嫪殊科需董孫間笙歌湘茆君才富江慎修  
震沃壤挾勝郛實學兼華文羣玉詘珽琚同時數金戴東  
殿撰程孝廉三舍避鼓燹丹書東面榮簪紱北斗禱  
何況禮爲羅不見鳳輝范桃潭暫迴翔蓬海易轉漕  
虎觀定異同鹿角走驚悞璧雍石經森公卿牢禮犒  
展圖重什襲長言當勸勞

儀徵阮元芸臺

周儀治天下厥功逾誓諧揖讓升降中精意靡不到  
吾友浚經師無雙齊許號綿蕞容臺上不受介紹導  
既有戴聖學且持高密操志氣堅不撼精力滿無耗  
弱冠我同遊許我入堂與嚶嚶兩鳥鳴頗異凡味噪  
實事必求是虛聲共恥盜君之入京師以禮爲履蹈  
始知士相見盡化頑與暴北海一席間驚譽馳四填  
惟知抱一經不願駕雙鷺宣城令官舍校禮志雅好  
昌黎所苦讀而君實排冑經文溯江河疏義析潢潦  
得問發一難皇慶賈公彥不敢報餘情述周髀知天



若裨竈重輪引虛綫測視了無眊淺儒襲漢學心力  
每浮躁豈知后與慶家法傳衰髦凌君發禮例楊復

李

如圭

不屑冒金

輔之

程易田

及劉

端臨

盧

召弓

相

見互不傲邇來文更雄魏晉力能造始歎才之奇實  
惟天所燾吾師極重才愈奇愈憐悼新詩榮於褒華  
充被單綯制科儻三舉會見交章告翹然賁弓車  
豈徒離席帽平生學何事許國敢恪嫪辟雍仰  
天藻詎止泮芹莩吾才陋且小地褊若滕郃與君素  
投分又若邸與瑁同在文公門籍湜各樹燾親老修  
天爵斯言昔所禱君今潔白養恩勤慰孚抱已勝飢

驅時負米比轉漕手此十七篇怡然志無愠天將厚  
其後茲特先韋犒所以吾師詩披圖深勸勞

江陰王蘇儕嶠

儀禮禮本經詰屈儷盤詰昌黎與廬陵欲讀苦未到  
不辨五雅名徒誌三易號自從赤光來勘觀黃流導  
扣槃祇自愚何瑟孰解操句讀尚莫分精神亦虛耗  
九成譌笙鏞一室昧宦輿斷簡日以零長喙嘿不噪  
鈔胥兼勦說時作青氈盜蒼茫何休海疇若魯連蹈  
次仲何鏗鏗寸晷無棄暴談天極四遊括地析九壤  
摘鐸欲問牛望練驚辨驚平視黃李儔同永鄭賈好

玉栢出廣川珠船獲夏稟學山到板桐沿流始潢潦  
重補釋名書匪望稽古報悅心願覆瓿阿世恥媚竈  
未遜長頭勤肯使眸子耗認取阿堵中釋盡少年躁  
嗟余不如人師承乏耆耄與君爲同年科第幸一冒  
頗招馬融嫉敢與孫宏傲人海八年別學舍一旦造  
精言渺河漢至樂駮載燾不殖久凋落相見始嗟悼  
日脚難繫繩弩末怯穿縞離經吁已遲發篋祈我告  
就竹共開尊漉酒時脫帽便便孰能窺嶽嶽不暇嫪  
苜蓿莫嫌寒苻菜尙可芼權眞卽越羸鼎質豈納郤  
聲同霜應鐘符合圭就帽長此甘藟鹽或勝擁牙纛

蛟龍不必夢虹玉奚待禱紛紛說經家  
臚膊雞孚拖隻手障狂瀾倒輓渭河漕  
卓識折其衷小巫爽然愧不易漆簡文  
寧冀乘韋犒酌醴酬斯圖聊爲經神勞  
晨起見庭中鳳仙花大放偶作

女兒花發競芳菲點綴閒庭錦四圍  
青靄乍乘紅鶴降綠雲齊擁紫鸞飛  
當檐露下晨光澹繞砌風來暑氣微  
入夏繁華猶若此未妨芍藥殿春歸

錢氏蒲圻張兆書妻也兆書卒兩子皆  
殤兆書有兄前卒其遺孤隨嫂他適錢  
取歸而子之又取其母家溺女育之以  
爲婦張氏祀得以不絕朱

石君師爲作孝友慈貞詩敬次元韻

夫亡子在不敢死空巢惻惻哺兩子兩子旣殤巢欲毀  
夫兄遺雛尙可倚撫孤拯溺將之歸居吉象得咸其腓  
嘗膽茹蘖恒相依見者涕洟聞者唏苦節自荷皇天慈  
追古列女與匹妃

已未

已未四月二十八日閱會試題名錄知牛次原諸  
人登第喜而酌酒醉後有作

好風吹墮千佛經巍然上有牛坤名喜極恐誤再三視  
紙背字字皆崢嶸徐觀交舊不止此聯翩大半知名士

榜中如史望之鮑雙五吳山尊王伯申張臯聞程春廬  
汪薌林馬器之吳春麓白小山諸君或同年或同門或  
舊相知識皆一時名下士也

奎垣佳氣接文昌海內人材拔茅起貢

舉今年收大蘇歐陽佐以梅聖俞

今科會試朱石君師及阮伯元侍郎爲總

裁

經神學海目點漆鐵網安得遺珊瑚憶昔京華困行

役春明誰識風塵客感君意氣如弟昆下榻南軒共晨

夕貂裘短褐不同調辛苦齏鹽兩年少更有畸士今司

城

胡樹思孝廉今爲中城兵馬司副指揮

貧賤相依互吟嘯論文下筆不

自休興酣往往登歌樓善和坊裏舊人在且喜看花猶

黑頭便遣長鬚急沽酒升堂奉觴先壽母盤餐旋復召

生徒樂哉此醉良非偶美人遙隔青雲端舉杯北望情

漫漫應知捷步金鼇際也向江南憶冷官

題朱約齋小照

儒說區如菽粟分窮經不解著空文試從南渡論精博  
唯有深寧叟似君

讀史有感二首

功名逾量本難居側目師師意自如吳郡漫傳豪士賦  
茂陵空上徙薪書通侯就第謹譁曰太尉登朝灑浙餘  
千古盛衰同轉轂研朱重與玩盈虛

周書曾載尹郊文爾有嘉謨入告君亮節果令千古重  
直聲何取四方聞叩頭對仗劉栖楚伏闕陳書谷子雲

未必公忠竝槐里敢言世少左將軍

禮經釋例稿成有作

十二月十七日

校勘丹黃十載餘今朝欣見稿成初漫嫌寂寞青氈冷  
慈竹平安好著書

庚申

題黃少眉笈雲圖小照

泰山之顛雲一縷觸石俄看布寰宇偶然攜取入笈中  
留待他年作霖雨鍊將仙液成金丹高卧不畏衣裳寒  
綳綳好應虞庭瑞莫與問雲一例看

周景峰以愛遊圖見寄索題



小別已三載披圖如對君攜將黃海月歸照赭圻雲歌  
咏思同賞登臨憶共醺敬亭山下路何日慰離羣

施明經南歸聞胡樹思卒官京師之信

初聞疑夢復疑真北望燕臺倍愴神誰與青燈憐弱息  
可憐白髮泣慈親雄才到此知何用薄宦依然未救貧  
賴有故人敦古處不教旅櫬久風塵

聞身後事皆牛  
次原爲之料理

豪氣如山竟寂然封侯難信是鳶肩驚心去國三千里

回首論交十八年欲踐隻雞思日後幸容雙鯉達生前

書到之日  
樹思尙存遙知酌酒春明路萬樹桃花叫杜鵑

雨夜讀張江陵太岳集書後

西風撼牖雨瀟瀟靜展陳編破寂寥嘉祐萬言王介甫  
會昌一品李文饒試尋經畫才原大卽論文章氣亦驕  
功罪千秋青史在爲君滿引醉寒宵

過湯霍林司成故宅

幾曲頽垣半畝苔蒼涼石獸沒蒿萊更無甲第連雲起  
賸有辛夷作雪開濁世未容清正論清流豈必拒奇才  
請看桃李茄花側都是司成手自栽

後學古詩十首

有序

乾隆乙巳爲學古詩二十首今已十六年矣銖積寸  
累又漸有所獲於是爲後學古詩十首他日倘能勉

其所未至當更有述焉

九章述勾股測天乃其略西法入中國遂有弧三角八綫立標準方圓更量度邊角互相求分秒無少錯斜正兼次形得數捷而約日月所運行太虛仰寥廓假以算經緯不啻掌中握渾蓋洎平儀非此不能作綴術佚已久弧矢亦高閣禮失求諸野未可遽菲薄汲汲勿菴叟中西細商摧黍尺塹堵篇千古惠來學

虞喜論歲差莫能言厥故自晉迄前明茫如坐雲霧或云日道縮臆揣豈足據近知緣恒星每歲自東去所以冬至宿虞周不同處歷六七十年向右移一度昔賢未

發覆由茲豁然悟妙哉歐羅巴談天憑實數七政同一  
源驗候了不誤古疏今漸密疇人慎推步

大地本圓形方指厚載德九天包地外樞機惟兩極人  
物周環列高下始可測溫帶氣和平是在赤道北冬寒  
而夏暑其下爲中國南北辨緯度昏旦異晷刻東西分  
經度證之以月蝕半年爲晝夜最易起迴惑相彼簡平  
儀中維能轉側以極作天頂諦觀心自得周髀有遺書  
古人固先識

赤道束天腰黃道斜絡之大距廿四度兩交相抱持七  
政行其上逐度皆東移南北曰二至冬夏各有時二分

在交點均由黃道推寒暑進退理平易原非奇仰觀偶  
指示童稚都可知底事張子厚冥心矜寸私妄謂亦左  
旋致啟儒生疑朱蔡注尚書從而爲之辭斜直本異勢  
後世胡能欺

日食爲月掩舊說世所解月食因地影新說人其駭不  
知泰西書中有至理在大地居天中日月相對待太陽  
光四照大於地數倍闇影落空虛星月爲匿彩吾道無  
不包芻蕘尚須採何況茲說長義和不能改猥云日亢  
月詎異蠡測海旣匪蝦蟇精詞人復笑罪張衡靈憲文  
洵足證千載

泠綸造律呂陰陽各爲六長短有定數分寸辨盈縮五  
聲及二變遞居如轉軸至理匪元虛淺近類菽粟茫茫  
宇宙間元音無斷續律準由京房笛譜自荀勗豈識聲  
音妙絲不等於竹自從鄭譯後但襲龜茲曲誰知十二  
管正半不相屬呂覽黃鐘宮實應半太簇鄙生李文利  
穿鑿怖流俗畫餅未可啖何必說龍肉

琴之仲呂均大弭屬下徵何者以爲宮仲呂之弭是試  
繹姜趙書端緒猶可指小間應散聲十徽與之比至於  
第三弭則下一徽矣二變隔其中不齊良有以考亭辨  
琴律胡爲昧斯理誤謂仲呂角見譏吳元士唐人作燕

樂字譜所從起合字定黃鐘宮聲不闕此但配十二律  
學者多疑似所以論樂書恒失古人旨

琵琶第一弭與琴七弭同燕樂高於雅律本爲夾鐘今  
古互岐錯如墮浮雲中七商生太簇其實乃變宮七宮  
暨七羽相應非談空器數苟相較清濁寧難窮實事必  
求是冰釋心融融從橫究累黍高議成捕風否則矜算  
術第詡乘除工世無曠與鳩兩耳何由聰景仁及君實  
辨論無折衷西山著新書適足驚羣聾

字譜有勾字用配蕤賓聲尺上闕高低本屬附會成譬  
駢拇枝指寧足爲重輕我讀夢溪書燕樂窺其精各調

殺聲字一一言分明勾字獨不用隱義已顯呈何待今  
俗工不似協笛笙間取琴七弦叩使次第鳴合四倍徵  
羽如物登量衡方信乙與凡二變之異名五降不容彈  
勾字何緣生豈如去此字樂府榛蕪清

琴不用二變聲故無乙凡二弦

詳見余所著燕樂考原

燕樂無徵聲其故久失傳追溯崑崙虛乃在開皇年四  
旦各七音分屬琵琶并宮商并角羽二十八調全後儒  
昧所自與義無能宣政和製徵調補作何拘牽不知雅  
與俗兩部本判然賴有耶律史片語千鈞懸

遼史樂志四旦二十

八調不用黍律以琵琶并叶之是知俗樂之原出於琵琶也琵琶四弦故但有宮商角羽四調而無徵調與雅



藥不孤學雖知希猶可尋遺編鬼神告於室似鑒思之  
專禱昧幸晤此願質唐宋賢

野望

羸犇行齧艸鷓鴣立其背夕陽將放晴隱隱秋雲內

校禮堂詩集卷十二

歛淩廷堪次仲撰

辛酉

黃直民同年以其先人牧原先生蘭心圖索題漫  
書一截

石門山下同心客留得當年手種蘭此是鄭公書帶草  
尋常休作斷金看

舟中卽事

陵陽先生囊橐羞青蚨千餘買小舟盛暑駕此欲何往  
俸滿大府驗去留皖城距郡五百里大江西上行溯流

夜眠曲躬足不展清晨小坐篷壓頭風逆撲面苦塵土  
風順烟纓難張眸風有順逆境靡適自笑窮者多煩憂  
沿岸打漿日數里僮僕對我皆怨尤豈無萬斛足快意  
阻風亦泊菰蘆洲卽令挂帆破高浪履險復恐鄰蛟虬  
舴艋雖小尙無患局促安得辭羈愁何時歸去茆屋底  
疎簾清簟作卧游孺人調羹婢煮茗越州酒進花瓷甌  
慈親含笑坐嘉樹簾几旁植延年鳩晚涼浴罷香滿地  
雜卉競發閒庭幽北窗高詠彭澤句脩竹壓檻如新秋  
始信在家貧亦樂何事萬里談封侯

答姚姬傳先生

皋比廿載擁名都言行眞爲士楷模談藝不譏明七子  
說經兼取宋諸儒是非原有遺編在同異何嫌立論殊  
傳得桐城耆舊學直偕熙甫繼歐蘇先生論文以歸熙甫上接歐蘇蓋其鄉方望溪劉才甫之說

皖上留別曾西井明府

昨君小隊來宣城賤子適有舒州行今君西返龍山道  
賤子東歸何草草五年惆悵惜離羣纔得相逢袂又分

尊酒未偕張籍醉

謂張君廉船

願從東野化爲雲

泊繁昌舊縣舟甫繫風浪大作戲成小詩

小艇徐依小港邊落帆剛值浪掀天遙知鼓棹爭先客

校禮堂詩集卷十二

多少中流未泊船

題邢仝山同年讀書松竹林圖

蘭臺傳儒林乃在循吏前爲治必經術詎曰矯史遷吾  
友仇池英作宰淞水邊仕而優則學豈弟羞鷹鷂詩書  
澤躬久流露始藹然繪圖以明志仰止貞元賢松風峻  
且潔竹雨清而妍展卷再三讀如見其心焉漫叟春陵  
行魯山于薦篇實學敷實政休作詩人傳顧我幼荒落  
與君忝同年鉛刀未敢試寂莫依寒氊獨學無友朋六  
籍誰其研何當載酒往相對尋遺編

辛酉 謝崇之公子去秋鄉試捷音兼寄中丞

蘇潭先生

烏衣公子本翩翩十八登科美少年蘇氏文章貽許國  
扶陽經術繼韋賢閉門冷署人來罕隔歲秋闈信始傳  
料得廣文詩到日已應騎馬曲江邊

程敬持舊及余門今春不遠千餘里自胸山來從  
學余甚愧焉頃將應江寧鄉試於其行也詩以  
送之兼寄令叔石村

數載吟窗別緒多忽聞脂輦渡關河敢希蕭奮傳經學  
深愧侯芭載酒過聽雨三春情尚爾停雲千里夢如何  
西風好與寶典燕先取由庚爲子歌

遣悶

藥裏書籤雜沓陳病中料理苦吟身詩因降格摹丁卯  
籍爲蒐奇校癸辛池上慈姑青乍坼庭前益母翠初勻  
逐牯日誦孫樵賦不信花卿句有神

小游仙詩二十首

少時嘗仿曹唐爲小游仙詩罕有存者及出游以來  
見作之者甚衆蓋風尚使然也秋日病起倦於治經  
與會所至輒復爲此聊用自遣而已大雅君子勿以  
效顰視之

雲笈叢中別有家懶從金鼎問黃芽石田種出琅玕樹

春到能開五色花

丹竈辛勤不計年功成謁帝大羅天升堂授玉陳庭實  
總學人間觀禮篇

天風吹下羽衣聲知是霓裳散序成莫向月中尋舊譜  
黃鐘都似夾鐘清

製成仙樂九霄中周徑乘除講律同底事飛瓊調玉瑟  
誤將下徵認爲宮

三千弱水不勝舟艸女童男枉自求誰信揚塵非異事  
如今騎馬到瀛洲

瓊樓葭瑄本難稽織女新添繡線齊不似三千年外景



羲輪已過斗牛西

天包水土在中間大地如丸四海環繞地昨宵行一匝  
何曾海上有三山

河呈圖象洛呈書天府深藏世本無大衍生成風角術  
被人偷去詎凡夫

紫府琅函懈究研那知禹貢有山川費他幾許儒生力  
俯瞰原來九點煙

辛苦蟠桃鎮日栽學仙本自要仙才靈臺悟出長生訣  
不是丹經稗販來

跨虎文簫慧業深雙聲未許鈍根尋彩鸞但寫唐朝韻

怕與凡人論古音

修成雲級一千層要見羣仙自此登  
底事霧中操畚客便云白日已飛昇

傳注紛拏鎖白雲仙官編校最殷勤  
金繩玉版依然在丹篆何勞證說文

天曹新改秘書郎始信求仙別有方  
四百金丹全未讀高持絳節下天閭

拾遺補闕日孳孳半綴陳言半改爲  
賈鄭分明在天上向儂皆道不如斯

玲瓏樓殿五雲開欲往先愁風引迴  
悞卻學仙人不少

妄將海市當蓬萊

桃源洞口景清幽中有文章萬古留聞道不知曾有漢  
况他魏晉與韓歐

元關俯視隙中塵狡獪區區亦可嘆收穀何妨從客便  
忍教花外虎驚人

一卷黃庭獻紫虛換鵝誇道永和初神仙但讀龍威策  
不解山陰世俗書

飢食青霞飽卽眠眞靈下試道心堅祇愁天上多官府  
未必天仙勝散仙

晚桂

瀟瀟微雨過重陽叢桂猶看滿樹芳不是小山招隱客  
敢隨籬菊傲寒霜

我愛二首

我愛沈寓山雙目如秉炬流人所是非何足爲勸沮和

仲及正叔持論互鉏鋤

檀弓曰死公不釋祭服而往竊謂溫公宜弔伊川之論非也

伸洛而絀蜀比黨其推許君獨操至公剛柔不吐茹譏  
罵無假借譬諸楊墨距并於所著書特紀元城語始知  
折柳諫溫公亦不與

我愛周贛洲一心如懸衡金華唐與政學海馳英聲偶  
與晦翁忤遂爲世所輕可憐天台妓何罪遭笞撻此舉

近傾險無乃非人情賴君齊東篇時一鳴不平宋史不

立傳幸有鄉後生

宋景濂有唐仲友補傳一卷見明史藝文志

下士耳學多

公論何時明

長興三鷗岡有晉謝太傅墓歲久漸湮邢侗山同年捐俸葺之并爲考見示徵詩漫賦一律

三鷗岡畔草離離謝傅荒阡尚有基兒輩將兵能破賊先生對客自圍碁川原游子徵遺跡伏臘邨翁走歲時不是長興賢令尹更誰刊石樹豐碑

壬戌

和杜竹吟刺史元旦卽事

一夜屠蘇酒朝來節序更賢愚年其長巧拙宦俱成雄  
辯千人屈狂吟四座驚他時應記取餞歲在江城  
若以文章論君宜鵷鷺班誰令辭賦客投老簿書閒稚  
柳凍難折瘦梅春可攀那知如許事且看敬亭山

答趙肖巖中書見贈二首

冰壺曾照五羊城萬里歸來徹骨清綸綍已推新閣老  
齋鹽不改舊儒生目無餘子文誰敵胸有千秋論自平  
尊酒都忘名輩後

令姪夢得大令  
與余已酉同年

頻來冷署話班荆

永日丹鉛手自操此身應爲著書勞不存形跡交逾厚  
消盡矜張品最高藻鑑淵源推重望文章家世領清曹

由來經術爲時用莫便從容蘊雉膏

元作

涇縣趙良衢 肖巖

宛陵得似宛邱無學舍如舟屈小蘇聊假冷官充著  
述况當聖代重師儒百篇堆案言宗鄭兩義名齋  
法取胡我向鱣堂常問字應憐白髮舊生徒

弱冠曾充弟子員先生誰似腹便便百城富自輸千  
卷一夕談眞勝十年教士從知無讀律養親奚待試  
烹鮮經師兼有人師重風采如臨泰華顛

朱錫章大令以飲中八仙圖屬同人題分得李適

之崔宗之二首

三陂能障洛川深難禦哥奴一寸心幸有醉鄉容托跡  
不須惆悵華山金

李適之

扁舟載酒大江濱公子亭亭玉立身采石月明宮錦麗  
一時頓有兩仙人

崔宗之

洪稚存同年自塞外歸主講旌德迂道過宣城見  
訪留宿齋中次日邀同趙肖巖中書戴斗垣廣  
文洎斗垣令子爾勤孝廉徧游南樓諸勝晚歸  
小酌卽席成詩

故人遠自塞外回皋比講席旌川開宛陵迂道特相訪  
話舊不惜傾千杯寒齋下榻再信宿佳壻佳兒並如玉



時稚存攜子符孫壻穆卿同至夜深刺刺語不休跋見風窗椽似燭南

樓詰旦同登臨約客正好天微陰道傍觀者堵牆立嘖

嘖爭看洪翰林鳳池舍人老詩伯說經不窮屢奪席廣

文先生兩目昏

斗垣目疾久未愈

胸中之奇邁張籍更有才子

方少年孝廉裘屐何翩翩槎枒老榦松柏古忽露一樹

春花妍茲游草草殊不惡歸來燒豬供晚酌座間名位

半浮沉放筆猶能撼河嶽酒酣爲我談烏孫祁連萬木

寒雲屯經過忽憶幼時夢疑攀北斗登天門

稚存自言幼夢登高

峰手攀北斗下瞰萬木如雪

及出塞過天山如夢中所見當年共作梁園客今日看

君須鬢白會當控衛雪中來豫爲留髡儲一石

戴爾勤孝廉見和鄙作謙下過甚請受業於余固  
辭不得命仍次前韻奉答兼以志幸

翼輪吳楫往復回知識都藉良朋開竭來寒氈坐荒落  
有若水置坳堂杯空山時時夢耆宿一旦披沙得珠玉  
隨侯和氏韞匱中自有奇光半天燭吟窗忽覩新詩臨  
西鄉遽效韓淮陰初驚繼愧迷五色置身如在其花林  
華蓮十丈擎龍伯促膝談深漸移席縱教肴饌萃百家  
畢竟根源歸六籍昔賢經術垂千年雲鶴天際翔聯翩  
皇荑或先大聲奏敦洽詎助陽文妍寸心不昧知熒惡  
更啟芳樽爲君酌鹿食嘉草呼其羣捧土頻思益喬嶽

居恒綿蕞笑叔孫古禮高閣疑塵屯願言期子申鄭義  
敢詡授受稱專門冠昏燕射及賓客禮例昭然分黑白  
遺編倘許其蒐羅從此交情訂金石

和作

婺源 戴揚輝 爾勤

退鷁拍拍燕都回歸帆恰向虹橋開過庭快敘天倫  
樂洗塵先捧階前杯急謁鱸堂不俟宿乍坐春風暖  
於玉先生看書眼如炬蘭絲牛毛靡不燭剝啄忽聞  
高軒臨芒鞋共踏青松陰欣識鳳池挾天藻更有容  
齋傾士林先生邀同洪雅存趙徑師人師見宗伯連  
肖巖二先生過訪日相招入讌席同來雙璧皆魯髦  
謂雅存先生萍水

如隸金蘭籍談笑敢謂疑忘年竦聽雄辨風翩翩胸  
中邱壑未易測舌底蓮華無數妍話到塞外風沙惡  
主人呼酒重爲酌但覺富貴如煙雲焉用聲名重華  
嶽今朝錦句擲天孫鏗鏘便已開蒙屯憐才憐到不  
才者始信廣大真法門到來幸列座間客會立程門  
看雪白願得將軍巧妙傳何當一矢射沒石

題吳復齋夢遊僧寺悟前生圖

才人慧業應成佛名士前身半是僧夢裏依稀尋舊境  
萬松深處一龕燈

李營甫司馬招飲卽席

佐郡清如水開尊酌冷官脩篁依戶淨古樹映窗寒待  
士情懷摯留賓禮數寬敬亭山色好日向畫中看

校禮堂詩集卷十二

校禮堂詩集卷十三

欽凌廷堪次仲撰

癸亥

宛陵晤蔣希裴并追憶令兄竹史同年

甲第高江左翩翩正少年鳳毛欣拔俗馬齒愧居先  
屬志酬當世論文朔昔賢因君仍感舊惆悵薊門煙

題瞿莪生枕庭讀禮圖二首

威儀與性共纏綿一度披圖一肅然既葬未妨尋祭禮  
特性篇後少牢篇

道學儒林轍本乖淹中一卷久塵埋禮堂別有千秋業

授受還應異勉齋

莫生爲辛楣先生令婿故云

宿西河鎮蚊多不能成寐戲作

黃昏行役僕夫閑近市叢祠聊解鞅東廊湫隘溽且炎  
熱氣蒸人如入甕紙窗破碎土壁朽夜半星光忽穿棟  
飢蟲百萬聚成雷斗帳不禁長喙衆羣飛雜遝聒耳煩  
飽食恣睢齧膚痛終宵輾轉到五更栩栩何曾得成夢  
禦此侵陵乏良策舉掌頻揮或偶中一蟲擊殺萬蟲來  
扇之暫開仍復壅乃知卑濕生此物感召相因如植種  
栽將藤蔓引虺蛇養得梧桐致鸞鳳况兼僮豎懶拂拭  
向晚垂帷留罅縫先時木自欠綢繆兩手雖忙究何用

若將此室加爽塏治病尋源知所重不然未睡豫驅除  
尚可逍遙便吟諷熟眠一夜亦偶然上池未飲誰能洞  
天明就道頻欠伸俯仰隨人時自訟疎簾清簟正安閒  
細帙徐開靜中誦無端檄下令走趨闐闐沿門任嘲弄  
風中棲息雨中餐隻候迎人雙候送旁觀倘羨此游樂  
風味不妨來一其

詠道旁烏柏樹

烏柏婆娑解耐寒一經霜信便成丹卽今未到清秋節  
都作尋常野樹看

寄張季和



校禮堂詩集卷十三

兩載京華別夢新如君屈指更誰倫詩篇大定劉無黨  
書法開元蔡有鄰都說西京能作賦况逢東閣正延賓  
花顛視草非難事休憶秋風八月蓊

錢辛楣先生以壬戌四月二十六日重游泮宮詩

寄示命和次韻

鸞旂彷彿認當年魯殿靈光尙巋然芹遇長庚重照後  
花思周甲再開前西京博士應攜手東武司空待比肩  
此去南宮剛一紀

先生以甲戌登第

瓊林春燕酒如川

壬戌四月廿有六日重游泮宮賦贈新先輩因追

懷西莊光祿

嘉定

錢大昕

竹汀

壬戌重逢采藻年恒河照鬢忽皤然莘莘俎豆今猶  
昔濟濟淵鸞後勝前三不朽間當立腳四先生往孰  
差肩磨牛陳迹重增感寂寞柴門鎖輞川

方穀存書來以二詩見懷索鈔鄙著甚殷且云有  
重饒通雅之舉奉答二首穀存密之先生五世  
孫也

忽枉新詩至如逢舊雨來山川千里隔懷抱一時開著  
述誠何補文章愧不才他時能寫定就質皖江隈

方氏推儒術浮山識最深試觀通雅學不讓顧亭林校  
勘鄉賢事

胡維君張侍喬並有通雅校本

流傳後嗣心吳門有新刻賣

校禮堂詩集

卷十三

徧大江潯

蘇州重刻通雅  
已盛行於時

讀崔實政論作

崔生論政意深長柔道從來運以剛  
郊壘執戈無度尙廟門持戟有任章  
太倉鼠雀方間暇巨海鯨鯢久陸梁  
守令金多爭入粟漢家何日塞宣房

張季和以尊甫柏園先生西阪草堂圖屬題漫賦

一律

扁舟嶺表載書還料理吟編日掩關  
試問東坡田二頃何如西阪屋三間  
詩人句好緣耽隱循吏情深總愛山  
生晚無由親撰杖卻從圖畫想清顏

朱學坡庶常之母未婚守志介陳鳳石同年來徵

詩應以二截句

震川曾著論貞篇秀水蕭山見亦然我道禮文緣義起  
試將詩句質前賢

撫得孤兒受

國恩

朝廷特詔許旌門凌寒百尺貞松在好藉春暉蔭子孫

題張鞠園太守揚子飽帆圖

飽帆曾紀過中泠今日于湖見使星

時權蕪湖道

大抵偉人

多好事由來循吏必通經相逢雖晚頭猶黑禮數都忘

眼倍青笑我攜琴歸自鼓還從流水寄芳馨

題許節婦蓐餘草

名燕珍

二首

新篇讀罷漏遲遲想見青燈白髮時  
喚作蓐餘應有意深閨知不僅吟詩

選韻修辭識苦甘才名久徧大江南  
前人可作誰堪擬流水棲鴉紀阿男

題楊健齋明經詩卷二首

懷古登臨寄一編客游初放渡江船  
多君三十才如海不減他山賦慎旃

健齋海寧人故以初白擬之

明珠編就玉穿成才自華腴氣自清  
仿佛成連琴作鼓

絲桐中挾海濤聲

答方象三

皖上衣冠奕葉新  
勲名輝暎學深醇  
聲華世仰先朝彥  
風度君真後起人  
會見天邊翔鸞鶩  
何嘗地上走騏驎  
清詩惠我難爲報  
好取瑤牋什襲珍

涉江何處采芙蓉  
無限相思隔遠峰  
適性未妨從所好  
滑稽聊復寓諸庸  
青氈自補蘭華詠  
黃卷寧羞苜蓿供  
多謝良朋相勸勉  
閉門新護手栽松

題蒲快亭同年出塞圖

虬鬚猿臂氣昂藏  
雄劍歸來夜有光  
莫笑一氍褕短褐

曾瞻

萬乘獵長楊穹廬記醉杯中月稊稻猶沾塞上霜我亦

狘羈秋度幕舊游回首意茫茫

癸丑秋從韓城師客灤陽

蒲快亭施雪帆以小集北樓詩見示戲柬

飛梯眞見倚雲垂太守乘閒酌舊知紅燭漫論千古事

青山猶似六朝時未妨促膝聯吟榻更喜掀髯對酒卮

前度勝游今不與

秋間偕稚存同年飲此

閉門空和北樓詩

癸亥十二月梅花大開偶作

愆陽未散溫風作滿院寒梅破紅萼壓枝爛漫開且繁  
未春已見紛紛落楊裘有客花下行蟻蠓撲面蠶作聲

天心仁愛不肅殺竊恐萬物無由成

甲子

吳之水騎尉新搆書室成屬作詩落之率賦二截  
數椽小築枕溪流三面晴窗宛似舟緩帶輕裘文譙罷  
未妨犒土更椎牛

名園野竹景全分况有階前樹拂雲解畫倚蘭香滿室  
勝他金碧李將軍

次韻牛次原戶部庚申初秋湘江舟中見憶二首  
獻策薊門道與君皆少年花宵文共賞雨夜燭同然挾  
骨情原摯盟心意更虔循咳今可樂未敢說遊燕



木元生詩集卷之三  
匹馬十年別雙魚千里情書來宛溪水人隔岳陽城勲  
業期同學飢寒負此生相思吟好句空憶鷓鴣聲次原寄來  
沙河舟行近作有楊柳曉煙千  
萬樹鷓鴣春雨兩三聲之句

元作

天津牛 坤次原

仲子別吾去於今已八年天涯一回首日暮更蒼然  
捧檄思毛義窮官類鄭虔從容尊酒會何日到幽燕  
日夜望江水烟波無限情所思在何許不見謝宣城  
學業兼師友心交訂死生故人相念意寄此別離聲  
寄祝座主韓城公八十生日四首時以宮傳致仕里居  
四十餘年侍

玉宸東門祖帳話猶新  
皋夔竟享林泉福  
圖綺嘗爲社稷臣  
想見丹忱依

北闕遙瞻紫氣滿  
西秦太平盛事真  
希有宰相歸來慶  
八旬

兩朝霖雨潤蒼生  
畫錦堂開待老成  
韓愈文名唐北斗  
桓榮經術漢東京  
人推舊學應知止

帝賦新詩爲送行  
親捧瓊鳩

恩似海壽星雙映日  
華明

風規不讓曲江賢  
貴幸當時亦凜然  
但以經綸酬

聖主肯將花木記  
平泉主朝自有千秋業  
附郭都無二

頃田仙佛素知公所斥祝公唯誦九如篇

曾依函丈客灤陽瞬息星霜十載強常許事功須學問  
每從器識論文章循陔已作中軍鶴介壽空餘博士羊  
曠典殊榮言不盡略標大節寄稱觴

次吳石臣進士見贈二首元韻

昔我廢學時年已十有五服賈鮮財貨爲工乏規矩逾  
冠乃發憤寸縵思汲古尼父訂禮經在田德施普說者  
惟康成餘子敢繼武孜孜考名物勤勤述訓詁慶戴海  
先河孔賈禰紹祖賤子不自量鑽研忘椎魯恒執筵撞  
鐘謬希軸折羽特豕酒三獻側尊醴一甌析例別異同

各使歸其伍幸溉先哲餘冀爲來學輔燈窗兩案間誰  
憐鉛槧苦一壘守冷官窮年竟何補詎盜處士聲差異  
碩人俛君家本世學

石臣從祖東璧先生著有儀禮章句

妄過雷門鼓自

就東西階寧分南北部惟慚守遺編不翅耕瘠土豈期  
文章雄於茲尙有取知己良獨難實爵爲君舞

制禮貴中庸道在無偏倚後儒賢知過遂失聖人旨附  
會二氏言母乃類枝指未幾門戶分一非復一是平地  
畫深谷坦塗出岐軌仁義禮之質復性在踐履奈何談  
空虛新義日填委蘭陵旣力排河汾亦深毀自非夔一  
足遑辨臧三耳紛紛七百年屢闢牀下蠹西河生君鄉

發贖由此始輔車仗德清將伯呼秀水唯禮及天象非其所長矣持論或過中矯枉非示詭君才富韓蘇當代固罕比胡爲逐流俗羣言惑朱紫來詩力詆西河毛氏惡憎而知其美窮經破成見庶幾患中弭入主出則奴生平用爲恥但讀十七篇不非十二子

方茶山同年以比部郎出守江西迂道宣州過訪是晚飲魯子山太守署中次日招同吳石臣進士戴斗垣廣文小集學齋卽席成詩兼以誌別

廿載交親兩鬢絲

時茶山鬚髮皆半白

一尊官閣又同持都忘學

術添新得尙覺疎狂似舊時送酒可懷陶靖節登樓應

憶庚元規世間多少宜明面說與寒醺總不知

甲子重陽前後屢有持蠹之會座中施雪帆戴蓮  
塘吳石臣戴斗垣諸君疊韻倡酬索和甚亟勉  
成長句

陵陽先生卧鄉校剝啄到門驚夢覺啟扉纔見意欣欣  
入座旋聞談稍稍腐儒不用市盤餐白酒在篋魚在罩  
已看紫螭入跪持寧惜黃花一枝拗陶然那復顧二豪  
益者何期得三樂憶昨兩度陪高會鴻辨不同簫鼓鬧  
邵公奪席誇學海仁裕登筵詔詩窖精如大將練士卒  
典似明廷策秀孝言飛玉屑唾成珠况雜元風兼象教

羣公高唱矜捷才繼起千篇愈騰遒雅知鷹隼出風塵  
幾見騏驎困泥淖奏刀真足渺全牛執管誰甘窺半豹  
自憐曹鄴不成邦勅敵當前多屈撓強思酬和代娛賓  
矢枉仍愁壺更哨爭雄競勝後莫支險韻已窮難與較  
縱令展轉索枯腸未必寒灰豆重爆無端問道別出奇  
拔戟還求尺寸效由來趨易本避難浪說傳神不在貌  
長吟擬倩雨爲催秋深不見雲起礮他時有興修重來  
訪戴休迴剡溪棹

次韻魯子山太守西華紀事詩四首

櫓檣倏見墜高天虞詡威行作今年滋蔓敢貽他日患

徙薪寧獨此城全  
矛頭夜下徵兵檄  
看鼻朝成紀事篇  
屈指論功開幕府  
懸知綠水有紅蓮

齊辨嚴裝礪短兵  
銜枚疾走不聞聲  
身先士卒三軍奮  
面縛渠魁百里驚  
奏上

朝端膺懋賞歸來  
閭左見歡迎  
旁觀莫訝成功速  
大勇原從集義生

囊韃袴褶氣豪雄  
猿臂能開八石弓  
官舍懸魚清似水  
賊壕驅馬捷於風  
烟消野戍遙  
山碧霧散荒屯落  
照紅遮道攀轅留  
不住又攜琴鶴向  
江東

經綸小試志初酬  
談笑能抒父老愁  
白刃雷霆宵霍霍



青燐風雨晝啾啾安良自必先除莠決勝由來在運籌  
料得柳陂南畝上少年無復佩黃牛

題同年陳子犀比部借書圖二首

一鷗風雨夜窗虛胸次居然萬卷儲滇徼山川彭蠡月  
使車應證借時書

自憐學舍小如舟寂莫何人載酒游猶記劍南詩句好  
異書渾似借荊州

周石荅明府以其六世祖忠毅公玉印見示并索  
題句敬賦一章印刻季侯二字公名宗健季侯  
其字也

崑山之精方一寸云是吳江舊時印摩挲故物二百年  
想見稜稜圭角峻堅貞在性不可磨嶺外坐閱風霜多  
文孫輾轉偶購得疑有鬼物長撫呵當年詔獄六君子  
三木囊頭後先死此時此印尙隨身碧血淋漓土花紫  
有明神廟之末黨禍成朝端水火交相爭茄花未紅委  
鬼伏是非邪正無由明先生數與東林異擊闕乾坤同  
正氣至今一印歸然存何慚高邑鐵如意天子方寵山  
陽君牢脩豎子何足云陽球不辦殺曹節三君八顧徒  
紛紛嗚呼先生一死真磊落耿耿丹心照河嶽西州不  
慕皇甫規北寺甘爲范孟博可憐彪虎諸僉人累累若

若皆灰塵如斗黃金亦閒事請看片石重千鈞

題汪鑑亭太守小照二首

松風忽作瀉時聲猶記連雲叱馭行我愛梁州貧太守  
大瓢分得漢江清

蕭蕭脩竹映流泉把卷臨風意澹然留得圖中馴鹿在  
他時應與鶴同傳

題戴斗垣溉菊圖二首

三徑寒花自可娛况兼脩竹竝高孤他年誰續清河舫  
記取先生溉菊圖

東籬寂莫獨行吟老圃蒼苔一寸深莫笑冷官貧太甚

秋來滿地盡黃金

校禮堂詩集卷十三

校禮堂詩集

卷十三

校禮堂詩集卷十四

歎凌廷堪次仲撰

戊辰

戊辰三月晦日雪

信是山城氣候違坐看春盡凜寒威  
綠槐遮戶裘仍擁紅藥翻階雪正飛  
塞上昔聞傳自久江干今事見應稀  
曉來把酒登樓望粉漬遙山碧四圍

卽事

穀雨纔過未浹旬果然淺夏勝深春  
飛花千點爛於錦新筍數枝長比人  
覓句有時撫鐵體逃禪無意證金身

校禮堂詩集 卷十四

睡餘試領問中味靜聽風泉響澗濱

月夜卽事

四卷纖雲淨碧空涓涓涼露濕疎桐鳴琴幽澗泉初落  
積水虛庭月正中前事漫縈西去燕後期猶盼北來鴻  
夜深不寐真無俚自起移牀就好風

麗仲出十年前所畫小照見示漫書

騏驎墮地時已有萬里心豫章始盈握其氣含千尋良  
金必鍛鍊然後可成器良士必苦心然後可立志馬不  
受羈勒不能遵康莊木不經斧斤不能爲棟梁勲業塞  
宇宙要自勤學始古今多事變不出經與史韜晦復韜

晦莫負美少年會使七尺軀他日圖凌煙

題畫冊因憶舊遊二首

綠楊門巷正春晴  
鑾水盈盈徹底清  
夾岸亂紅三十里  
桃花時節過新城

青山缺處幾人家  
槿戶茅檐靜不譁  
恰似宛陵城外見  
東風一路野梅花

聞戴爾勤南宮捷音詩以寄之

相依七載水雲鄉  
猶記陵陽舊草堂  
每向沈潛覘學術  
更從器識論文章  
自饒東觀千秋業  
敢說南豐一瓣香  
料得曲江春讌日  
少年爭羨杜黃裳

深渡去歛南六十里乾隆庚子偕先兄及大姪扶  
先君子柩歸葬次年正月由浙往揚泊舟於此  
風景尙依依如昨也

當年負土發黔江豪氣如山未易降屈指青燈三十載  
依然襤被宿船牕

威坪卽挈源洞在淳安北六十五里韓蘄王擒方  
臘處也

扁舟過威坪檣棹躡蒼岫在昔韓將軍於此縛囚獸逮  
至南渡初平盜績屢奏腐生昧古今苦將和議詎不知  
蘄與鄂功在殄羣寇及與金師遇奔潰不敢鬪鄱陽考



兵制誰與細研究三復對遺編用諗兔園陋

桐廬

東下嚴陵過青山兩岸疎微風張葦席細雨過桐廬遠  
浦看飛鳥輕舸喚賣魚白雲紅樹裏最好早秋初

將到杭州作

故人開府越江邊折簡相招此放船都忘雲泥長揖下  
卻思風雨短檣前頭顱老大方重聚骨肉凋零已數年  
早晚明湖秋萬頃登樓應羨水如天

舟中坐雨

浙瀝聲將暮篷窗擁被眠客憎窮日雨山愛富春烟境

定非關懶心空不悟禪賦詩聊遣興時拂衍波牋

秋分日渡浙江作

萬頃秋江四望開乘潮擊楫渡江來正當玉宇初三夜  
纔看銀山第一回紅樹尙遮錢氏壘青山遙指越王臺  
此行會見長鯨縛信有人間出衆才

舟中卽事二首

八尺烏篷雙槳輕暮雲疎處夕陽明迎人好景皆圖畫  
不負山陰道上行

東浦沿門挂酒旗人家夾岸屋參差羨他一水清如許  
醞釀寰區不自知

姚江篇

六經日月光中天家法端賴儒林賢王何以來弊漸出  
稍有異論違師傳翻新好奇宋所尙竟以二氏參遺編  
援儒入釋始關洛理窟時挾曹溪禪晦翁無極本丹訣  
貫通佛老尤融圓襲其精微詆其跡面目雖變心神專  
語錄日增經術廢漢唐舊說成飛煙元明不復根傳注  
耳目蔽錮垂千年陽明學亦考亭學竊鈎竊國何譏焉  
至今兩派互相詬稽之往訓皆茫然本天本心苦爭辨  
潢潦烏足言通川著書往往自希聖無端白日生狂顛  
唯於大學知復古隻手獨探驪珠淵恪遵聖言不改竄

特識遠出徽公前由此一端足俎豆可與鄭孔相後先  
譬之葑菲或節取不妨餘事皆棄捐至於傳習納子語  
淺陋何足容鑽研整菴入佛復攻佛枉費心力爭蹄筌  
平生不識朱與陸今秋偶放明州船舟中莊誦小戴記  
弭節自賦姚江篇

鄞城秋感

力戰東南未罷兵  
翁洲烽火照嚴城  
窗前曉日羣鴉散  
枕上秋潮萬馬驚  
叢桂乍添霜後色  
高梧時作雨來聲  
遙聞諸帥傳飛檄  
屢報鯨波旦夕平

夜渡曹娥江

乘月中宵過上虞青山無限映冰壺諸天都入光明界  
大地新懸寶色珠廿載壯遊前可數一時清景後難摹  
扁舟竟夕難成寐聊借微吟當畫圖

游南鎮廟道逢芸臺中丞騶從口占

松陰徒步避軒車遮道鳴騶曉日餘此際相逢真下馬  
始知古語未全虛

南鎮廟

東南一柱峙遙天夏后遺踪此尙傳禮視三公名最古  
州分四鎮位居先千秋弓劍徘徊處萬國衣冠會計年  
莫訝隨刊無故蹟其山猶載職方篇

過蕭山

千古精言萃考亭竟將二氏入遺經姚江也是濂溪派  
認取蕭山萬疊青

歸舟偶作

扁舟新自甬江還海色天容指顧間我比大蘇加一等  
此行曾看浙東山

戊辰十二月十九日雪後登小金山其地去淳安  
十里有汪氏始祖墓墓前石刻書乾隆己巳稠  
聖汪氏重修其記稱漢中平間龍驤將軍守會  
稽汪文和深以爲訝同游者云是漢時歙州刺

史見汪氏家譜當必有據戲拈一截示之

歙州建置始開皇刺史何緣漢已彰請讀晉書王濬傳  
中平安得有龍驤

已已

紙鳶戲和陳桂堂

刻楮爲鳶世競知聊將文采付兒嬉修吭吸露原非傲  
瘦骨凌雲亦自奇蠟鳳未妨同宛轉木雞偶與共追隨  
此身一葉輕如許恐被腰纏太守嗤

題阮梅叔珠湖漁隱圖

碧波滑笏浣蓑衣月夜明珠照讀歸聞道北湖漁隱日

淮南草木借光輝

題韓錦仙課經圖

晴窗春晝日遲遲萬綠爭扶玉一枝會見百花頭上發  
莫忘深柳課經時

寄張褰伯

褰伯從余學於寧國學署十有一載質疑問難晨夕  
相得丙寅余以魯子山太守之招主講敬亭復相聚  
處時余年屆五十以有母憂不受慶祝而褰伯賦五  
言古一章見贈余甚喜其持論堅守余說次年正月  
別後倏將三載矣茲自杭歸檢埋舊稿擬於秋後北



上見其雜古文并所贈詩恍如晤對爰作此答之以誌相思兼廣其志卽以當書札云爾

憶昔在宣州光景如目前旃蒙單閼歲始充博士員宣  
州文物邦閭閻競誦絳學舍依陵陽桃李春爭妍張生  
駿伯來執摯禮尤虔云奉嚴君命負笈來周旋藉我爲  
師資晨夕相摩研我初不禮辭竟如生有緣稟性春潭  
靜識解明鏡懸舉一可反三善問如攻堅羣情羨軒冕  
奔走如附羶吾子慕實學守拙如摩磚獵經並漁古一  
一尋蹄筌興地欲證今推步求割圓羣經有釋禮語孟  
兼釋天古樂成圖說翻音稽叔然尤好禮經學三校十

七篇羅列諸家本點勘勤丹鉛且欲事圖考經注重疏  
詮餘力及梅詩譜成擬撰箋讀書得條貫功因鐵硯穿  
我於壬戌冬擁被忽不眠爲學譬拙井一旦忽及臬探  
源星宿海因思障百川乃歎宋儒理均是釋氏禪事理  
並稱之體用對舉焉顯將衲子語學者久相沿孰知聖  
人教其道無倚偏禮則小大由譬如輕重權持循實有  
準中庸德乃全安用索空虛登岸渺無邊惟子聞茲論  
服膺則拳拳謂是六經與久失辦香傳立議宗先聖旁  
徵及後賢經與史子集細大總不捐如李穆堂原敘趙鹿泉中庸總論之  
類悉爲兼以吾所述合爲約禮編聖道真面目庶幾廬  
探入

山巔儒家此書行其論彌坤乾佛老支離說不攻自可

痊豈同講學流徒拾人唾涎敬亭山色佳宛句相澄鮮

聚首十載餘師弟情綿綿曲肱爾祖亭長溪可力田黃

谷集有題宛陵張待舉曲肱亭詩乃裴伯二十世祖也

伊尊人永祿上舍欲遵先志重建于長溪村側藏書以

課子孫請約余文爲記余善其志四海我爲家何時受

許之不識異日亭與文均能成否

一廬丁卯春之初宣州重言還送別城南門揮涕且留

通時惟子與陳主綱甫一別歷三春觸境情相牽去秋甬東行烽

煙鼓鼓填阮芸臺中丞在寧波督勦洋匪朱濱蔡會登

天一閣圖書世澤延茲復西湖回良友歸嬋娟去冬阮中丞爲

余生子計曾贈一姬字韓芳

今四月中攜歸擬秋後北上

秋末京華遊青雲擬著鞭

八

日將與子遠後會知何年夙審得修稊與古爭後先三  
復贈我詩尤探驪珠淵知已信難得撫躬應自憐子年  
富且強吾衰膂力愆努力勤就將吾道誰仔肩著述洵  
可樂千古惟陶甄事功亦其期良馬寧終邇寄言素心  
人學術貴精專雲山千百重相思子勉旃

元作

宣城

張其錦 裴伯

大哉夫子學獨啟不傳祕緒論嘗側聞請述證同異  
聖道燦六經以禮爲實事本從仁義生曲防寓深思  
三百復三千一一爲布置賢哲資適從愚柔亦勉至  
中庸善欲明大學知先致中庸貴誠身大學重誠意

卽此爲知行五常信與智卓犖觀羣書聖道本平易  
孔子吾道宗出類又拔萃顏淵才庶幾改過曾不貳  
博文必約禮教學遠垂示周末大義乖諸子爭旗幟  
孟荀二大儒微言賴弗墜性惡孟子非性善荀卿僞  
著論各有殊蹈禮總不二漢儒起燼餘家法醇而肆  
守闕迄抱殘彬彬敦古誼卓哉鄭康成括囊無遺議  
百家入陶鎔六藝獲整次綿延及隋唐此道人猶識  
或以故訓求或以典章肆達磨從西來教不立文字  
妙悟矜聰明佛法愈橫恣吾儒識不宏見之反心悸  
翻覺吾道粗遜彼教深邃羣然共憂之竊取自推比

妄謂本幽深後儒不克嗣幸將糟粕存轉令菁華棄  
強附說聖經空理乃昌熾婺源朱晦菴學富才天昇  
格致以爲宗誠敬祈自遂金溪陸子靜聰穎絕倫類  
獨主尊德性外學蒙譏刺朱學元已行陸學狂明季  
禪有南北宗吾儒可取譬後人論異同好惡分軒輊  
孰識亡羊均學庸禮之記元妙以釋經皆爲聖道累  
悠悠七百年禪義爲經義 國朝古學昌亭林乃鼓  
吹推步有勿菴中西理兼備東樵說周易易圖難雜  
厠百詩考古文疏證論不陂最後惠戴興學者多翹  
企吾師起新安學貫天天地兼有諸儒長精博復純

粹以禮作紀綱道尤可該器海內數眞儒儔輩咸推  
避十載陵陽鐸冷官遠祿利吾黨斐然裁華潔孝不  
匱著書稱滿家釋例托夙志賤子昔受經於禮有篤  
嗜今茲明誠堂猶聞詔辟呬日日坐春風束躬慙附  
驥硜硜守一經志空存攬轡側見吾師心臨深同惴  
惴鄙謂勿庸憂立德自天庇少忍以待之不爽有報  
施九如篇可歌三多吉自值守大在守身況乃道攸  
寄虎觀訂羣經佇看弓旌賁道德黜元虛實義復洙  
泗樸學與華文天下咸衣被賤子祝經神祇此日希

冀

贈種花汪叟

汪伯玉司馬裔孫也住太函山

太函碑版照四裔文采風流及子孫種樹百年留別業  
評花竟日掩間門貧惟適興耽詩筆老尚多情戀酒尊  
辛苦灌園常抱甕怕將機事向人論

校禮堂詩集卷十四